

٢٢. كلم ربنا

كلم
ربنا بيناديك
رد
ما تضيعش الفرصة من ايديك
ربنا بيفتح لك باب الرحمة و المغفرة والعفو
اتحرك ، قرب ، اسجد
بجسمك بقلبك بعقلك
ليه مش عايز تروح
ليه بتعند
بتعند مع اللي خلقتك؟
بتعند ضد نفسك
انت عارف و عامل عبيط
دة طريق الجنة و دة طريق النار
واقف مكانك ليه ؟ مستني ايه؟
مش عايز تتحرك ، بس عايز الجنة!

رحمته واسعة ، بس اتحرك
اعمل حاجة ،
لو تتقدم خطوة، تتفتح الابواب
و الخطوة بعشرة و اكثر

برضه مش عايز تتحرك
انت ايه؟ مغرور كدة ليه
انت ناسي اصلك ايه
اصلك تراب و طين
متكبر علي ايه
و علي مين
طيب جرب المرة دي ، خطوة واحدة بس
و هتشوف
هتندم أنك ما قربتش من زمان
هتلاقي النعيم و حلاوة الايمان

جرب و قول لي
و لو ما لقتش حاجة ، ابقى ارجع الخطوة تاني
بس جرب بجسمك و بقلبك و عقلك
جرب و اسجد بجد
و كلم ربنا
ناجيه
اشكي له و اطلب منه
انوي بس و جرب
في رمضان
دة مفيش حواجز و لا حيطان
حتي الشيطان
حبسه ، عشان انت تقرب
يبقي خايف ليه تجرب
معقوله ، خايف من الحنان المنان
دة انت لو قربت هتلاقي دنيا غير الدنيا

هتلاقى حاجة تانية
عمرك ما شفتها و لا هتشوفها
غير لما تجرب
تجرب تقرب
عارف لما تقرب ، انت اللي هترتاح
هتحس كأنك كنت طول عمرك قطر من غير قضيب
كأنك تايه و لقيت الطريق
عموما ، مش هتصدق غير لما تجرب
في رمضان
معقولة مش عايز تكلمه؟
مش عايز ليه؟ دة بيحبك
و برعايته كل يوم بيشملك
بييسر لك كل الطرق عشان تروح له
مع ان انت الفقير

انت اللي محتاجه

يساعدك و يقف جنبك.

و هو الغني
لكن من كرمه
هو اللي بيندهلك
يلا قوم
اقفل بابك عليك
و اخشع بين ايديه
و كلمه
كلم ربنا و ناجيه

و جرب